





人代紀要卷之二十二

明吳興顧應祥編集

大埔黃宸校刊 江陰湯明善校正

庠生倪佩 臧繼華同校

丁卯

梁太祖開平元年

春三月唐遣宰相張文蔚楊涉御史薛貽矩等齎  
玉冊傳國璽至大梁

四月朱全忠僭即帝位更名晃是為梁太祖大赦  
改元開平奉唐帝為濟陰王遷于曹州以兵守之  
梁主兄全昱謂曰朱三汝本碭山一民從黃巢為



盜天子用汝爲四鎮節度使富貴極矣柰何一旦  
滅唐家三百年社稷它日得無滅吾族乎梁主不  
懌而罷

梁以汴州爲東都開封府洛陽爲西都長安爲大  
安府佑國軍

以馬殷爲楚王錢鏐爲吳越王高季昌爲荆南節  
度使封兄全昱爲廣王

以唐相張文蔚楊涉爲門下侍郎薛遺矩爲中書  
侍郎同中書門下平章事

盧龍節度使劉仁恭爲其子守光所囚梁以守光

爲盧龍節度使守光兄義昌節度使劉守文起兵  
討守光請降于梁 梁遣使諭蜀王建拒不納

晉李克用吳楊渥岐李茂貞俱仍稱天祐年號建  
仍稱天復移檄討梁建遺李克用書請各帝一方  
克用不從建乃自僭稱皇帝是爲蜀高祖

梁侵晉圍潞州

契丹耶律阿保機率衆寇雲中晉李克用與之連  
和約共攻梁阿保機背盟反附于梁

是歲唐亡

唐自高祖武德戊寅稱帝傳二十主至昭宣帝



天祐丁卯凡二百九十年為朱溫所滅

戊辰

蜀王建武成元年

春正月晉李克用卒年五十三長子存勗繼是為  
後唐莊宗克用臨卒以一箭屬存勗期滅契丹存  
勗大破梁師潞州圍解梁主嘆曰生子當如李亞  
子

梁主晃弒濟陰王年十七謚曰哀帝葬溫陵後唐  
明宗追謚昭宣光烈孝皇帝

梁張文蔚死楊涉罷于競張策同平章事  
梁殺金吾將軍王師範夷其族

蜀王建改元武成元年以養子王宗佶為太師為  
樞密使唐襲所譖撲殺之

淮南張顥徐溫弒其主楊渥欲分其地以臣於梁  
幕寮嚴可求以太夫人史氏教立渥弟隆演為留  
後復以溫計斬顥推楊隆演為節度使

華原賊溫韜發唐諸陵 楚收茶稅

晉李存勗遣兵助劉守光擊敗劉守文

己巳

春正月梁遷都洛陽羣臣上尊號曰睿文聖武廣  
孝皇帝 梁以王審知為閩王

劉守文招契丹攻守光擒守文囚之以攻滄州判



官孫鶴推守文子延祚為帥拒守

梁以劉守光為燕王

淮南盡取江西地

蜀行司天監胡秀林所獻永昌曆

庚午

劉守光克滄州殺其兄守文族判官呂充釋孫鶴

充客趙王匿充子琦逃之琦後力學自立晉以為

代州判官

岐加楊隆演為吳王

之

梁夏州亂殺節度使李彝昌以其族父李仁福代

梁天雄節度使羅紹威卒以其子周翰代之

梁以楚王馬殷為天策上將軍

吳越築捍海塘廣杭州城

辛未

梁乾化元年

五月改

蜀永平元年

燕劉守光應天元年

梁青海節度使劉隱卒弟巖知留後

梁主避暑于河南尹張宗奭第淫其婦宗奭全義

改名也

燕劉守光稱帝改元應天孫鶴諫令軍士毋而噉

之

按孫鶴為守文守滄州城陷不能死乃為讐人



之諍臣死不得其所矣

幽州參軍馮道奔晉以爲掌書記

蜀主改元永平號英武睿聖光孝皇帝

壬申

梁主晃以子婦入侍寵愛假子友文妻王氏欲傳位友文次子郢王友珪妻張氏知之以告友珪友珪夜入內命僕夫馮廷諤刺梁主腹刃出於背以敗羶裹之瘞於寢殿晃被弒時年六十一乾化二年葬於伊闕縣號宣陵謚神武元聖孝皇帝爲梁太祖友珪即位改元鳳曆殺友文以敬翔同平章事

自古僭逆之賊其暴橫淫亂無如朱溫者及爲子所弒得禍獨慘故備書以示戒

以楊師厚爲天雄節度使 朱友謙以河中附晉

忠武軍亂殺節度使韓建

吳以徐溫爲鎮海節度使

是年蜀主建加號英武睿聖神功文德光孝皇帝命尚食使歐陽柔治田令攷故第掘地得令攷所盜唐傳國璽以獻

癸酉

梁末帝

春二月梁主晃第三子均王友貞與楊師厚謀起



兵討賊友珪令馮廷諤先殺妻次殺已廷諤亦自  
剄駙馬都尉趙巖龍虎統軍袁象先齋傳國璽詣  
大梁迎均王均王曰大梁創業之地何必洛陽遂  
即位大梁更名鎰加楊師厚中書令進爵鄴王仍  
稱乾化三年以姚洎同平章事追廢友珪為庶人  
招朱友謙歸藩

梁以高季昌為渤海王

蜀主以道士杜光庭為諫議大夫

蜀太子元膺與樞密唐道襲相構被殺立幼子宗  
衍為皇太子

晉王入幽州執劉仁恭劉守光以歸

甲戌 晉以劉仁恭父子獻廟祭其先王斬之

高季昌攻蜀不克而退或勸蜀主乘江漲決堤以

灌江陵判樞密院毛文錫諫止

是年南詔寇蜀敗還

乙亥 梁貞明元年

十一月改元梁主更名瑱 梁分天雄為兩鎮人  
心不服作亂降于晉晉主入撫定之

吳徐溫出鎮潤州留子知訓江都輔政

廣州劉巖求封南越王梁不許朝貢遂絕



丙子

蜀通正元年

契丹神冊元年

梁以吳越王錢鏐爲諸道兵馬元帥

是年冬十月蜀主改元通正元年

契丹阿保機自稱皇帝國人謂之天皇王是爲遼  
太祖大聖大明神烈天皇帝以述律氏爲皇后置  
百官改元神冊皆中國人韓延徽教之遂以延徽  
爲謀主

韓延徽初爲劉守光參軍遣往契丹求援阿保  
機怒其不拜留以牧馬述律后曰延徽守節不  
屈賢者也阿保機始禮用之延徽善屬文有智  
畧教契丹建牙開府築城立市以處漢人逃亡  
者少契丹遂威服諸國後奔晉陽爲掌書記主  
緘所嫉復入契丹阿保機待之益厚至是爲相  
大抵夷狄侵犯中國皆中國人教之議者謂延  
徽甘從契丹急於見用而不慎所歸蓋富貴功  
名之士難以道義責之但以中國之才而中國  
不能用遺於夷狄惜也

丁丑

蜀天漢元年

契丹圍幽州晉李嗣源擊敗之

劉巖稱帝于廣州國號越改元乾亨是爲南漢高



祖 梁以錢鏐為天下兵馬元帥

晉李克用委政監軍張承業軍政肅清饋餉不乏

蜀主改元天漢國號漢又改明年為光天復號蜀

戊寅

蜀光天元年  
南漢乾亨元年

蜀太子宗衍好酒色遊戲信王宗傑賢蜀主有廢  
立意宗傑暴卒蜀主疑之

夏六月蜀王建殂年七十二謚神武聖文孝德明

惠皇帝廟號高祖陵曰永陵太子宗衍立去宗止  
名衍以宦者歐陽晃為將軍預政

吳朱瑾殺徐知訓而自殺

吳以徐溫養子徐知誥為淮南行軍副使輔政

晉大舉伐梁屢破梁

越劉巖改國號漢

己卯

蜀王衍乾德元年  
契丹天贊元年

晉以郭崇韜為中門副使

夏四月吳徐溫用嚴可求計請楊隆演稱帝隆演

遂稱吳王改元武義用天子禮以溫為大丞相都

督中外諸軍事東海郡王 徐知誥為左僕射參

知政事嚴可求為門下侍郎 追謚楊行密為孝

武王廟號高祖渥為景王廟號烈祖



是年蜀主衍改元乾德加尊號聖德明孝皇帝

庚辰 梁朱友謙以河中降晉

是年春南漢始置選部以明經舉進士

夏五月吳主隆演因徐溫父子專政建國稱制非

其本意成疾而卒年二十四謚宣王徐溫迎行密

第四子丹陽公溥嗣其位

辛巳

梁龍德元年

吳楊溥順義元年

蜀吳勸晉稱帝時魏州僧得唐黃巢亂時所失傳

國璽獻于晉晉主欲稱帝張承業泣諫成疾

吳楊溥二月改元順義十一月僭祀南郊

是年晉成德將張文禮殺節度使趙王鎔晉以符

習為留後討之

壬午

春正月晉大敗契丹

監軍使張承業卒年七十七謚曰正憲

契丹改元天贊

晉李嗣昭攻鎮州敗死以其子繼韜為昭義留後

秋九月晉克鎮州自領魏博以符習為天平節度

使

癸未唐莊宗同光元年

吳越寶大元年

春二月梁以錢鏐為吳越國王



晉李嗣昭子繼韜以潞州叛降梁以為節度使

夏四月晉主李存勗稱帝魏州國號唐是為後唐

莊宗改元同光以豆盧革盧程同平章事郭崇韜

張居翰為樞密使盧程尋罷

唐李嗣源取梁鄆州以嗣源為節度使

梁敬翔薦王彥章為招討攻唐德勝南城三日拔

之進攻楊劉唐主救之始退彥章尋為倖臣譖罷

梁段凝賂近臣求為招討使以張漢傑監軍攻鄆

敗績王彥章被擒唐主欲用之不屈而死

冬十月唐主乘勝入大梁梁主瑱慮諸兄弟乘危

為亂盡殺之日夜涕泣不知所為置傳國璽於臥

內忽失之已為人竊獻唐矣謂皇甫麟曰吾不能

自裁可斷吾首麟遂殺梁主方自殺遂滅梁

段凝率精兵五萬降賜姓名李紹欽以為泰寧軍

節度使敬翔自縊死段凝復奏梁趙巖張漢傑等

弄權害民與李振併敬翔家俱族誅貶唐臣仕梁

者宰相鄭珏以下十一人追廢朱温朱友真為庶

人漆友真首藏于太社欲斷温棺焚其屍河南尹

張宗奭入朝言之而止宗奭復名全義

楚馬殷吳楊溥俱遣使入貢荆南高季昌避諱改



名季興入朝遣還鎮

朱友謙温韜俱入朝賜朱友謙姓名李繼麟温韜姓名李紹冲

昭義李繼韜重賂伶人入朝尋欲爲亂被誅

以趙光胤韋說同平章事豆盧革判租庸鹽鐵使遷都洛陽以長安爲西京京兆府

唐主善音律自傳粉墨與優人共戲優名李天下是歲後梁亡

蜀主宴群臣於宣華苑相狎淫亂

南漢始舉進士

後梁朱温丁卯篡位傳均王癸未爲李存勗所滅二主共一十六年

唐莊宗初入汴李振謂敬翔曰有詔洗滌吾輩相與謁新君乎翔曰吾二人爲梁宰相君昏不能諫國亡不能救新君若問何辭以對是夕忽報李已入朝矣翔乃自縊死夫唐之士夫無耻事二姓者固多至如李振尤爲可惡初振爲唐金吾將軍拜台州刺史不果行遂投朱温表爲節度副使昭宗遷洛往來京師朝臣側目振視若無人有小怒必加譴謫時人目爲鴟梟又贊



朱温殺戮縉紳投之黄河助温為惡傾移唐祚罪大惡極人人之所共惡者也及梁祚已移乃欲首謁新君希圖復用其無耻不亦尤甚乎

甲申 岐李茂貞入貢於唐以為秦王尋卒以其子繼曦

為鳳翔節度使

唐群臣上尊號曰昭文睿武光孝皇帝

唐復以宦官為內諸司使及諸道監軍

唐以伶人陳俊儲德源為刺史

唐孔謙賂伶官為租庸使

唐主以郭崇韜言立次妃劉夫人為后劉夫人素

微賤不認其父及為后與唐主同幸河南尹張全

義第拜全義為父

吳越入貢于唐改元寶大

蜀以宦官王承休為天雄節度使

唐遣客省使李巖使蜀言蜀可伐

漢劉巖更名涉

乙酉

漢白龍元年 蜀咸康元年

春二月以李嗣源為成德節度使

黜李從珂為突騎指揮使

唐宦官詐言宮中見鬼采民間女三千餘人充後



宮

唐復以洛陽為東都興唐為鄴都

唐作清暑樓郭崇韜諫不聽

蜀主改元咸康

五臺山僧誠惠詭言能降龍呼風召雨唐主帥妃拜之安坐不起群臣惟郭崇韜不拜大旱祈雨不應誠惠逃去慙愧而死

秋九月唐主以魏王繼岌西川行營都統郭崇韜充都招討制置等使大舉伐蜀以荆南高季興為招討使許其自取夔忠萬三州冬十一月王衍

降遂滅蜀誅王宗弼王承休蜀人食其肉

以董璋為東川節度使

孟知祥為西川節度使

閩王王審知卒子延翰立唐以為威武節度使

漢白龍見于三清殿改元白龍漢主更名龔音取

飛龍在天之義

南詔驃信鄭旻求婚於漢妻以增城公主

漢主好夸大奢侈聚珍寶為玉堂珠殿遣使詢中

國虛實言唐必亂不足憂呼唐天子為潞州刺史

楚鑄鉛鐵錢



是年蜀亡

蜀王建以唐大順二年據成都天復三年癸亥  
進爵蜀王後梁開成二年戊辰稱帝至後唐同  
光三年乙酉為唐所滅傳二主自封王至國亡  
凡二十三年

吳越實正元年

丙戌唐明宗天成元年

唐劉后遣宦官馬彥珪密教魏王繼岌殺郭崇韜  
于蜀并殺崇韜子延誨延信

唐主聽宦官伶人譖言下詔暴郭宗韜罪殺其諸  
子又以崇韜婿睦王存又攘臂稱冤李繼麟亦與  
連謀俱殺復繼麟姓名朱友謙

李紹琛以郭宗韜死反於蜀任圜平之

魏王繼岌以蜀樂工嚴旭獻唐主以為蓬州刺史  
鄴都軍皇甫暉等作亂遣李紹榮討之不克群臣  
請遣李嗣源唐主疑忌不許累言之始遣將親軍  
討鄴嗣源至鄴為亂兵所劫嗣源詭言收兵出奔  
相州李紹榮誣奏嗣源與賊合嗣源欲自理屢奏  
皆為紹榮所遏嗣源欲入朝其將石敬瑭曰豈有  
大將與叛卒入城得保無恙乎嗣源遂舉兵反  
唐豫借河南夏秋稅宰相請出內庫財給軍劉后



不許 唐主以景進言遣人殺王衍夷其族

夏四月唐馬直軍王溫作亂伏誅唐主戲謂馬直指揮使郭從謙曰汝既負我附崇韜存又又教王溫反何也從謙即伶人郭門高也素敬事崇韜又爲存又養子因而疑懼帥所部兵反時朱守殷領騎兵在外唐主召之不至近臣宿將俱潛遁唐主中流矢鷹坊人善友扶至絳霄殿廡下抽矢渴憊劉后不來視遣人進酪唐主遂殂年四十三善友聚樂器焚之劉后囊金寶與申王存渥李紹榮出走朱守殷入宮選宮人三十餘人內其家諸軍大

掠李嗣源聞之慟哭入洛陽止于私第禁焚掠拾唐主骨殯之是年秋七月始塋于新安縣伊陵謚光聖神閔孝皇帝廟號莊宗宰相豆盧革率百官上牋勸進嗣源不許止稱監國以安重誨爲樞密使殺李紹榮復其姓名元行欽殺孔謙罷租庸使及諸道監軍

劉后奔至晉陽與存渥私通存渥爲下所殺劉后爲尼監國遣人殺之

監國令所在訪求諸王安重誨與李紹箕密遣人殺之 唐魏王繼岌還至長安聞變自殺



是月李嗣源稱帝即位有司請更國號不許仍稱唐號大赦改元省宮人伶官教坊鷹坊御厨禁獻竒玩廢內庫四方所上物悉歸有司復假子本生姓名 嗣源本夷狄無姓名邈佶烈爲李克用義兒是爲後唐明宗皇帝 以鄭珣任園同平章事馮道趙鳳爲端明殿學士豆盧革韋說罷

自古無道之君以聲色田獵逸遊以至喪亡者有之矣未有寵任伶人以至殺身者也自古女后專政以滌亂竊權有之矣未有以皇后教與制勅兼行密殺一大將者也莊宗可謂昏庸甚矣

李嗣源之反起於伶官之譖迫於李紹榮之激方其聞變入洛之時猶有興復唐祚退歸藩服之意殺戮諸王皆非其本心當時豆盧革輩位居宰輔目擊郭從謙之弒逆朱守殷之背主既不能討又不能請於監國明正其罪而急急於奉牋勸進何爲者耶觀嗣源之天資朴實可以進言者但其目不知書素無學術無有以大義告之者耳

是年契丹阿保機死謚大聖皇帝述律后愛其中



子耀屈之更名德光立之長子東丹王突欲不得立

唐復以李嚴為西川都監

閩王延翰自稱大閩國王驕淫殘暴審知義子建州王延稟襲福州弒之立其弟延鈞更名鱗

吳乾貞元年 契丹天顯元年

丁亥

春正月唐主更名亶 以趙在禮為鄴都留守皇

甫暉為秦州刺史 以馮道崔協同平章事

西川孟知祥殺監軍李嚴 任圜罷

高季興破蜀無功又掠魏王繼岌所進蜀珍貨四

十萬表請獲忠萬三州自除刺史不許遂據夔州

削其官爵遣兵討之後隋州刺史西方鄴克復三

州追論宰相之罪殺豆盧革韋說

高季興附于吳封秦王

唐以馬殷為楚國王

以郭從謙為景州刺史遣使誅之夷其族

宣武朱守殷反遣兵討之守殷自殺

安重誨矯詔賜任圜死

吳丞相徐溫卒是為南唐義祖養子知誥繼事

十一月吳楊溥稱帝改元乾貞



唐主立親廟於應州舊宅

是年契丹改元天顯

戊子

南漢大有元年

吳遣使至不受

以孔循為東都留守王建立同平章事

義武節度使王都反奚契丹助遣招討使王晏球

破之 秋七月唐收麴稅

八月唐以王延鈞為閩王

九月唐溫韜段凝伏誅

十二月荆南高季興卒年七十一謚武信吳立其

長子從誨

是年南詔楊干貞滅鄭氏立趙善政國號大天興

又廢善政自立國號大義寧改元光聖

楚攻南漢封州劉龔懼筮得大有改元楚兵敗

巳丑

吳大和元年

春二月唐王晏球克定王都伏誅并獲奚酋禿餒  
斬之

三月唐主子從璨酒酣戲登榻安重誨奏殺之

以趙鳳同平章事 唐以高從誨為荆南節度使

削吳越王錢鏐官爵

巳丑

卷之三十三

大



吳楊溥加號睿聖文明孝皇帝改元大和以徐知  
誥中書令

庚寅唐長興元年 二月改

唐安重誨諭河中牙將楊彥溫逐其節度使李從  
珂遣兵討之從珂入朝自明重誨諷馮道趙鳳奏  
從珂失守加罪唐主不從 四月群臣上尊號聖  
明神武文德恭孝皇帝

唐立 子從榮為秦王從厚為宋王 以范延光  
為樞密使

兩川節度使董璋孟知祥連兵反詔遣石敬瑭討  
之誅董璋子光業夷其族

楚馬殷卒年七十九謚武穆王次子希聲立  
契丹東丹王突欲從扶餘泛海歸唐賜姓東丹名  
慕華以為懷化節度使

安重誨出督征蜀諸軍

辛卯 唐賜契丹突欲姓名李贊華以為義成節度使  
以李從珂為左衛大將軍復錢鏐官爵

以李愚同平章事趙延壽為樞密使石敬瑭兼六  
軍諸衛使

吳以宋齊丘為右僕射致仕



唐罷麴稅

以宦者孟漢瓊為宣徽使

安重誨以太子太師致仕唐主遣人殺之并殺其二子

閩王延稟舉兵襲福州兵敗為閩王鱗所殺鱗遣弟延政建州撫慰其民唐以延政為建州刺史閩王鱗惑於道士陳守光作寶皇宮居之極土木之盛

壬辰

唐初刻九經板印賣之以高從誨為渤海王

楚王馬希聲卒追封衡陽王弟希範立

三月吳越錢鏐卒年八十一謚武肅子傳瓘嗣位更名元瓘

夏四月董璋襲西川為孟知祥所殺知祥遂併有東川詔兩川節度使以下官聽知祥自署

以李從珂為鳳翔節度使

冬十一月以石敬瑭為河東節度使敬瑭以部將劉知遠為押牙

癸巳

閩龍啟元年

閩王鱗以道士傳寶皇語宜少避位當為六十年



天子命其子繼鵬權主府事既而復位復問六十年後安歸曰當為大羅仙人鱗遂受冊寶皇僭即皇帝位改元龍啓命其宅曰龍躍宮國號閩

夏州定難節度使李仁福卒唐以其子彝超為彰武留後以安從進為定難留後彝超拒命詔安從進討之不克遂以彝超為定難節度使

唐以養子從珂為潞王第四子從益為許王孟知祥為蜀王

吳徐知誥營宮城於金陵封錢元瓘為吳王

太僕少卿致仕何澤請建太子不從以秦王從榮為天下兵馬大元帥位宰相上

趙延壽范延光避秦王從榮作亂求去以延壽為宣武節度使延光為成德節度使以朱弘昭馮贇為樞密使親軍都指揮使康義誠以其子事從榮

冬十一月唐主疾危秦王從榮以兵入求立樞密使朱弘昭馮贇拒之皇城使安從益斬從榮并其子唐主由是疾劇遂殂年六十七清泰元年葬洛陽縣徽陵謚聖德和武欽孝皇帝廟號明宗迎第

三子宋王從厚嗣位



有天下者傳之子非以私也所以止亂也立嫡以長世亂以功皆謂其所生之子義子不得而與焉明宗長子從璟爲元行欽所殺使從璟有子當立從璟之子從璟無子則以次當立者舍從榮其誰耶若其不賢宜明白昭示不堪主器別爲之圖若無甚大過亦當優容擇師傅以導之今既不立又加以兵柄是教之使爲亂也潞王從珂雖有功處以大鎮世爲藩屏可也明宗乃謂其子重吉曰吾與爾父冒矢石定天下從榮輩得何力當呼爾父授以兵柄耳斯言也是又啓從珂篡逆之心也是皆明宗不學無術之故而馮道輩不能以理論之焉用彼相哉初何澤請建太子明宗泣下謂左右曰群臣請立太子朕當歸老太原耳一念之差遂啓攘奪之禍亦可謂貪戀者之戒

甲午唐閔帝應順元年

潞王清泰元年

蜀孟知祥明德元年

閔王鏐永和元年

春正月唐以高從誨爲南平王馬希範爲楚王錢元瓘爲吳越王

蜀孟知祥僭稱皇帝國號蜀改元明德以趙季良



同平章事王處回爲樞密使李昊爲翰林學士知祥卒偽謚文武聖德英烈明孝皇帝廟號高祖陵曰和陵第三子昶嗣位仍稱明德

朱弘昭馮贇議徙潞王從珂鎮河東石敬瑭鎮成德從珂遂反詔西京留守王思同統六鎮兵討之羽林都指揮使楊思權帥諸軍解甲投降官軍潰散王思同被執不屈從珂改容禮之楊思權等耻見其面擅殺之并掠其家資妓妾從珂嗟惜累日康義誠自請爲招討使馬步都指揮使朱洪實請以禁兵固守洛陽徐圖進取與義誠相爭唐主斬

洪實軍士蓋憤從珂兵至陝康義誠及諸將迎降朱弘昭赴井死安從進殺馮贇并斬弘昭二首獻于從珂

孟漢瓊單騎赴陝投降從珂誅於路隅

唐主出奔衛州路遇石敬瑭盡殺其從騎

夏四月潞王從珂入洛宰相馮道等勸進僭即皇帝位改元清泰以太后令廢唐主爲鄂王遣人殺之并殺其四子磁州刺史宋令詢聞唐主遇害慟哭自經死 誅康義誠夷其族以馮道爲匡國節度使



韓昭胤范延光爲樞密使盧文紀姚顛同平章事  
復以石敬瑭爲河東節度使 李愚劉昫罷  
是年閩王鏐改元永和

初孟知祥聞唐明宗殂謂其僚佐曰宋王幼弱  
爲政者皆胥吏小人其亂可坐而俟也觀此則  
從厚乃仁柔之主耳豈從珂之敵哉或謂安重  
誨逆知從珂必反可謂獨見夫重誨爲明宗親  
信重臣既知之何不誠心直道密告明宗早正  
嫡庶之分名位已定從珂雖強豈敢越禮犯分  
以自取不韙之罪乎却乃陰謀詭計使人逐之  
而又欲附致其罪忠臣謀國顧如是乎况又起  
于小嫌其心未必出於公也

乙未

吳楊溥天祚元年

唐主詔開賢路 趙延壽房暉爲樞密使馮道爲  
司空 夏州節度使李彝超卒兄彝殷代

吳楊溥加號睿聖文明光孝應天弘道廣德皇帝  
改元天祚

徐知誥進太師天下兵馬大元帥封齊王  
閩王鏐以父婢陳金鳳爲后陳與嬖吏歸守明百  
工院使李可殷通鏐婢李春鶯有姿色長子福王



繼鵬烝之求春鶯鱗與之次子繼韜怒欲殺繼鵬  
繼鵬謀于皇城使李倣倣遂弑閩主於九龍帳殺  
陳后繼韜李可殷歸守明等而立繼鵬更名昶謚  
鱗爲齊肅明孝皇帝廟號惠宗昶惡倣專政刺殺  
之倣部曲奪倣首奔錢塘

閩王昶通文元年

丙申

春正月閩王昶立父婢李春鶯爲后改元通文  
夏五月唐以石敬瑭爲天平節度使拒命不受以  
張敬達爲招討使與楊光遠等率師討之  
秋七月殺石敬瑭子四人

石敬瑭遣掌書記栾維翰奉表稱臣契丹事以父  
禮許割盧龍及鴈門關以北諸州以求救援劉知  
遠諫以爲父事之太過割地恐爲異日中國之患  
不聽

秋九月契丹主德光兵救石敬瑭塘大敗

冬十一月契丹立石敬瑭爲皇帝國號晉改元天  
福以幽涿薊檀順瀛漠蔚朔雲應新媯儒武襄十  
六州入于契丹以趙瑩栾維翰同平章事

唐楊光遠殺招討使張敬達降于契丹趙延壽與  
其父行營都統趙德均俱降于契丹



唐主從珂與曹太后劉皇后雍王重美等携傳國璽登玄武樓自焚石敬瑭入洛陽廢從珂為庶人以馮道平章事

是年南詔段思平逐楊于貞而奪其國改號大理都直咩城段氏始此

丁酉

晉高祖天福二年

南唐徐誥昇元元年  
遼會同元年

晉葬故唐主從珂骨于徽陵南

夏四月遷都于汴

范延光反遣楊光遠討之

閩王昶拜道士譚紫霄為正一先生陳守元為天

師起三清殿以黃金數千斤鑄寶皇及無始天尊

太上老君像日焚龍腦薰陸諸香作樂以求還丹

又以方士言作白龍寺百役繁興

以吳越王錢元瓘為天下兵馬副元帥進封吳越

國王

契丹耶律德光改國號曰遼改元會同以趙延壽

為樞密使

吳徐知誥更名誥篡吳主位改元昇元國號大齊

是為南唐烈祖光文肅武孝高皇帝奉楊溥為高

尚思玄弘古讓皇



吳自楊行密據有淮南以唐昭宗天復二年封  
王至晉高祖天福二年為李昇所篡傳四世三  
十五年

戊戌

蜀孟昶廣政元年

晉作定命寶其文曰受天明命惟德允昌

以馮道劉昫為冊禮使謂契丹主為父皇帝上表  
稱臣歲輸金帛少不如意輒來責讓

契丹亦遣使韓頻冊晉主為英武明義皇帝

升汴州為東京洛陽為西京

范延光降以為天平節度使尋致仕

以楊光遠為天雄節度使

封閩王昶為閩國王不受命

徐誥遷讓皇楊溥于潤州尋卒追謚睿皇帝

蜀孟昶始改元廣政

世史正綱稱徐知誥弑其故主考五代史南唐  
書俱無明文止從史

己亥 徐誥復姓李更名昇國號唐

南唐初主名昇字正倫五代史通鑑俱同惟南  
唐書作昇誤矣李昇初受禪國號大齊及更名  
復姓欲自附于唐宗室之裔始改號唐



按司馬公通鑑謂唐主欲祖吳王恪或曰恪誅死不若祖鄭王元懿乃命有司考二王苗裔以吳王孫禕有功禕子峴為宰相遂祖吳王自峴五世至父榮其名率皆有司所撰考異曰周世宗實錄及薛史稱昇為末王璘苗裔江南錄以為建王恪玄孫蜀李後主實錄云唐嗣薛王知柔為嶺南節度使卒于官其子知誥流落為徐溫養子吳越備史又謂昇本湖州安吉砦將潘氏之子為吳將李神福虜為僕徐溫見其謹厚求為假子時有識語云東海鯉魚飛上天遂冒李姓於此觀之則昇之族屬殆不可考未可信其為唐餘也

晉以劉知遠杜重威同平章事

桑維翰為彰德節度使

封唐許王從益為郇國公

廢樞密院以印付中書分判

馮道守司徒兼侍中

閩主以巫者林興言殺其叔父延武延望又因醉殺從弟繼隆叔父延義陽為狂愚避禍閩主賜道士服幽於私第拱宸控鶴軍使朱文進連重遇迎



延義弑閩主昶而自立稱閩國王改元永隆更名  
曦稱藩于晉謚閩主為聖神英睿文明廣武應道  
大弘孝皇帝廟號康宗

庚子 楚平群蠻立銅柱於溪州

晉西京留守楊光遠殺范延光晉主不能詰以光  
遠為平盧節度使

晉罷翰林學士併其職於中書舍人

晉封閩王曦為閩國王曦城福州西郭度僧萬人

晉加吳越王元瓘尚書令

辛丑 吐谷渾苦契丹貪虐降晉不受

成德節度使安重榮執契丹使者請伐契丹

劉知遠為北京留守遣親將郭威招吐谷渾白承

福等徙內地安重榮勢沮

山南節度使安從進與安重榮俱反

閩主以其弟建州刺史延政為富沙王

閩王曦僭稱皇帝

杭州大火焚盡宮室吳越王元瓘驚懼疾卒年五

十五謚文穆子弘佐立年十三

是年南唐徵諸郡丁口鹽錢後世徵戶口食鹽始

此



壬寅

晉出帝

南漢光大元年

春正月晉杜重威平安重榮斬其首以獻契丹

漢主龔卒年五十四謚天皇大帝廟號高祖陵曰

康陵長子秦王洪度立更名玠改元光天以弟洪

熙輔政

契丹以晉招納吐谷渾遣使責讓晉主憂悒成疾

出幼子重睿拜馮道立之仍命召劉知遠輔政

夏六月晉主殂馮道與景延福等議立高祖兄敬

儒之子齊王重貴是為出帝不召知遠知遠怨之

秋八月安從進平

晉加景延廣同平章事兼侍衛都指揮使

晉復行官賣鹽法

嶺南博羅縣吏張遇賢有神降其家循州群賊共

禱于神言遇賢當為汝主遂奉遇賢為主稱中天

八國王改元永樂

癸卯

唐保大元年

閩天德元年

漢應乾元年又改乾和

春二月唐主李昇殂年五十六謚光文肅武孝高

皇帝廟號烈祖陵曰永陵長子景通立更名璟改

元保大是為元宗明道崇德文宣孝皇帝

閩富沙王延政僭稱帝於建州國號殷改元天德



漢主玠驕淫好飲觀手搏弟洪熙因其醉命力士  
劉思潮扶掖拉殺之洪熙自立更名晟改元應乾  
弟洪杲請誅思潮等晟怒殺洪杲祀天南郊復改  
元乾和群臣上尊號大聖文武大明至道大光孝  
皇帝

冬十月晉主立其叔母馮氏爲后馮氏晉高祖弟  
重胤妻也重胤幼育于高祖故以重字名行重胤  
卒馮氏寡居晉主遂納之

楊光遠誘契丹入寇

是年唐平張遇賢於虔州白雲洞

以宋齊丘爲青陽公遣歸九華

楚作九龍殿

甲辰

晉開運元年

春正月契丹陷晉貝州度河晉主自將督諸道兵  
分擊契丹敗去

晉以御營使景延廣爲西京留守以其不救咸城  
之戰故也 晉籍鄉兵

遣使三十六人分道括率民財州縣吏因而多取  
河南府出錢緡二十萬景延廣率三十七萬留守  
判官慮億讓之延廣慚而止



人个系要 卷之三十一 三十一  
馮道罷以桑維翰爲中書令兼樞密使

晉復置翰林學士

晉李守貞討楊光遠圍於青州光遠子承勳劫其父以降晉不欲顯誅命守貞遣人拉殺光遠以病死聞以承勳爲汝州防禦使

是年漢劉晟殺其弟弘昌

閩指揮使朱文進閣門使連重遇弒閩王曦文進自立收王氏宗族五十餘人皆殺之以連重遇總六軍殺王延政遣吳成義討文進不克文進稱藩于晉以爲閩國王

閩南廓承旨林仁翰等刺殺連重遇斬文進迎吳成義入城函二首送建州

乙巳

閩故臣共迎殷王延政入福州仍號曰閩

閩李仁達以雪峰寺僧卓儼明稱帝作亂復刺殺儼明稱藩于唐以爲威武節度使更名弘義閩亡又降于吳越

晉符彥卿等大敗契丹于陽城契丹主乘橐駝而遁晉以馮玉同平章事桑維翰罷

唐攻閩主延政降以爲羽林大將軍

閩自王潮於唐僖宗光啓三年丙午入泉州昭



宗乾寧三年丙辰爲威武節度使乙巳年弟王  
審知代梁太祖開平三年己巳封閩王二傳至  
王延鈞於唐明宗長興三年稱帝至晉出帝開  
運二年乙巳爲南唐所滅自入泉州至王延政  
降七傳共六十年自王審知封閩王至降唐傳  
六主凡三十七年而亡

丙午

劉知遠殺白承福夷其族

契丹入寇晉將王清戰死大將杜重威李守貞不  
救與裨將張彥澤以兵降敵彥澤爲契丹先驅入  
大梁殺宰相彙維翰幽晉主于開封府晉亡

晉主重貴已降契丹主詰所獻傳國寶非真重  
貴曰潞王從珂自焚寶不知所在此寶先帝所  
爲群臣備知乃止觀此則所謂傳國璽者已不  
存久矣晉自石敬瑭丙申年篡位傳出帝丙午  
年爲契丹所滅凡十年按石敬瑭以中國地土  
賂夷狄而得帝纔十年而爲夷狄所滅夷狄果  
足恃哉

丁未

漢高祖天福十二年

遼世宗天祿元年

春正月契丹耶律德光入大梁百官伏路迎候廢  
晉主重貴爲負義侯徙黃龍府殺張彥澤百姓鬻



食其肉景延廣自殺

按張彥澤甘心降虜幽辱君上殺戮朝士且自謂有功契丹旗幟皆題赤心報主不知所報者何主也畢竟反爲契丹所誅可以爲逆臣之戒以李崧爲樞密使馮道爲太傅諸藩鎮皆降縱兵大掠以趙延壽爲中京留守

立後唐明宗子郇公李從益爲許王改汴州爲宣武軍以其妃兄阿鉢立名蕭翰爲節度使守之自後遼后家俱以蕭爲姓以張礪和凝同平章事

契丹陷相州屠之遺民僅七百人而髑髏十餘萬二月晉劉知遠稱帝于晉陽仍稱晉天福十二年以蘇逢吉蘇禹珪同平章事

德光回至殺胡林死國人剖腹實鹽而去謂之帝羝是爲遼嗣聖皇帝廟號太宗趙延壽入恒州自稱權知南朝軍國事

夏五月契丹東丹突欲之子兀欲執趙延壽即皇帝位于中京其祖母述律后以兀欲不當立欲廢之兀欲幽述律后於木葉山改元天祿晉主以其弟劉崇爲北都留守



契丹蕭翰聞知遠擁兵而南矯契丹主命立許王  
從益爲帝而去從益母王淑妃泣曰吾母子亡國  
之餘豈敢爭天下避歸私第以俟知遠

晉主劉知遠遣使殺李從益母子入大梁改國號  
漢仍稱天福年號以杜重威爲歸德節度使拒命  
討之重威出降以爲太傅

以竇貞固李濤同平章事

是年楚馬希範卒年四十九謚文昭弟希廣立其  
庶兄馬希萼以長爭立國亂

南漢主劉晟殺其弟八人納其女克後宮作離宮

千餘間飾以珠寶設鑊湯鐵床剝剔等刑號生地  
獄

吳越王錢弘佐卒年二十謚忠獻弟弘侔立統軍  
使胡進思廢之而立其弟弘俶

戊申 漢乾祐元年

春正月大赦改元乾祐更名暉以馮道爲太師

漢主疾劇長子承訓先卒以第二子承佑屬宰相

蘇逢吉未及封而漢主殂年五十四祕不發喪誅

杜重威市人爭啖其肉二月封承佑爲周王即皇

帝位年十八謚漢主睿文聖武昭肅孝皇帝廟號



高祖葬睿陵 李濤罷以楊邠同平章事

郭威為樞密使

護國節度使李守貞反

趙思綰據長安城作亂

經畧關中王景崇叛降蜀

李崧為其僕所誣蘇逢吉與翰林陶穀又譖之被

殺滅其族

荆南節度使高從誨卒年五十八贈尚書令謚文

獻第三子保融立

巳酉

漢隱帝乾祐二年

契丹遷晉故主重貴於建州給田耕來自贍

五月趙思綰降郭從義誘而殺之

郭威克河中李守貞自焚死

冬十月吳越募民墾田

十二月趙暉攻鳳翔王景崇自殺焚死

庚戌 漢遣使瘞河中鳳翔遺骸二十萬

以郭威為鄴都留守樞密使如故威以妻兄柴守

禮之子為子名郭榮以為貴州刺史

秋八月故晉太后李氏卒于契丹

冬十一月漢主惡臣下專政與太后弟李業等謀



八代紀要 卷之三十一  
殺樞密使楊邠侍衛史弘肇三司使王章又遣使  
殺郭威威用魏仁浦計倒用留守印更爲詔書欲  
誅將校激怒將士起兵入漢主率師禦之不克至  
趙村避入民家爲亂兵所殺蘇逢吉閻晉卿郭允  
明皆自殺郭威入汴馮道帥百官謁見威拜之如  
平時迎高祖弟崇之子武寧節度使劉贊立之太  
后臨朝以王峻爲樞密使

誅劉銖李洪建等威曰劉銖屠吾家吾復屠其家  
庸有極乎乃赦其家

郭威至澶州將士擁立王峻王殷遣兵拒劉贊以  
太后誥廢贊爲湘陰公以威監國

是年楚馬希萼弒希廣自立

南漢以宮人爲女侍中朝服冠帶參決政事

辛亥

周太祖廣順元年

春正月郭威篡即皇帝位改國號周改元廣順是  
爲周太祖 弒湘陰公於宋州

以范質王浚李穀同平章事郭榮爲鎮寧節度使  
王朴爲掌書記

劉崇稱帝晉陽仍用乾祐年號有并汾忻代嵐憲  
隆蔚沁遼麟石十二州之地遣使契丹乞師契丹



冊崇爲大漢神武皇帝更名旻是爲北漢  
楚將徐威等廢馬希萼立其弟希崇爲武安留後  
徐威等欲殺希崇請兵于南唐南唐遣邊鎬擊之  
希崇遂降遷馬氏之族於金陵楚亡

楚自馬殷於唐昭宗乾寧二年爲刺史據湖南  
統二十三州傳子希聲希範希廣希萼希崇六  
主凡五十七年爲南唐所滅

遼泰寧王割察皮室詳穩益都等弒其主兀欲及  
太后壽安王璟誅割察等即位改元應曆謚兀欲  
爲孝和皇帝廟號世宗葬顯陵璟小字述律太宗

德光長子群臣上尊號天順皇帝是爲遼穆宗孝  
安敬正皇帝好飲常睡人謂之睡王後更名明

朱子綱目是年直書燕王述軋弒其主兀欲自  
立述律討殺述軋代之通鑑纂要諸史會編俱  
因之歐陽五代史則云燕王述軋與泰寧王嘔  
里僧殺兀欲于大神淀德光子齊王述律聞亂  
走南山契丹擊殺述軋嘔里僧而迎述律以立  
溫公通鑑云燕王述軋及偉王之子太寧王漚  
僧作亂弒契丹主而立述軋與歐史同而文少  
變丘瓊臺世史正綱止書契丹兀欲爲其下所



殺述律立及查遼史本紀云遼主南伐歸次化州祥古山祭讓國皇帝于行宮群臣皆醉察割反帝遇弒年三十四遼史逆臣察割傳云察割謀亂不果帝伐周至詳古山太后與帝祭文獻皇帝于行宮群臣皆醉察割歸見壽安王邀語弗從以謀告耶律盆都從之是夕率兵入弒太后及帝因僭位號牒蠟傳云牒蠟字述蘭封燕王為南京留守察割弒逆牒蠟方醉其妻扶入察割之幕因從之由是觀之則弒兀欲者察割也僭位號者亦察割也牒蠟乃同謀之人耳意者當時欲立牒蠟而未成歟察割字歐辛故五代史作嘔里僧通鑑作漚僧燕王本字述蘭而通鑑諸書俱作述軋恐番語傳譯之誤温公通鑑本諸五代史然猶謂與泰寧作亂弒主而立述軋綱目則併泰寧去之而直書述軋行弒不知何據竊謂遼史雖成於元人之手然作史必有國書可據况記載明白宜從遼史

是年南漢取桂州盡有嶺南地

壬子 周主如曲阜謁孔子祠墓訪孔子顏淵後為曲阜令及主簿



制稅牛皮法每田十頃稅一皮

癸丑

郭榮爲開封尹封晉王

王竣兼平盧節度使尋貶商州司馬

立圜社稷壇太廟于大梁

甲寅

周世宗顯德元年

春正月周主疾祀圜丘僅能瞻仰改元顯德尋殂

年五十一謚神聖文武恭肅孝皇帝廟號太祖晉

王榮即位是爲周世宗以王溥同平章事

馮道死

北漢主劉旻卒契丹冊其次子承鈞更名鈞稱兒

皇帝

乙卯

周始給漕運斗耗每斛一斗

王朴獻開邊策擢諫議大夫知開封府事

廢無額寺院三萬餘所禁度僧尼

䟽汴水至泗上 吳越入貢

括民間銅器及佛像鑄錢

丙辰

周遣趙匡胤克唐滁州擒其將皇甫暉姚鳳以匡

胤爲定國節度使兼殿前都指揮使

立二稅法夏稅以六月秋稅以十月

周伐唐屢敗唐師唐遣其司空孫晟奉表于周問



以國事終不屈賜死

召華山隱士陳搏至復遣還山

丁巳

北漢天會元年

周克唐壽州以節度使劉仁瞻盡忠所事賜爵彭

城郡王 作刑統

李穀罷以王朴為樞密使周主父柴守禮殺人  
不問 以竇儼為中書舍人

北漢主鈞改元天會

周設賢良經學吏禮等科

戊午

周鑿鶴水引戰船入江

周克唐楚州防禦使張彥卿鬪死所部千餘人至  
死無一人降者

荆南高保融以水軍助伐唐

唐盡獻江北地罷兵

汴渠成江淮舟楫始通

唐主改元交泰更名景夏五月去帝號奉周正朔  
稱顯德五年

唐以太弟景遂為晉王以燕王弘冀為太子多不  
法唐主欲廢之弘冀毒殺景遂

放宋齊丘于九華山



南漢主劉晟卒年三十九謚文武光聖明孝皇帝  
廟號中宗陵曰昭陵子衛王繼興立年一十六更  
名銀改元大寶以宦官龔澄樞爲內太師軍國事  
咸取決凡群臣有才能及進士狀頭先下贊鑿然  
後得進亦有自宮以求進者名爲內侍行進士方  
得貴顯餘爲門外人不得預事

巳未

春正月王朴作律準定大樂

二月導汴入蔡以通陳穎漕運

減羨田稅

賑淮南飢不責償 三月王朴卒

夏四月周主自將伐契丹取瀛莫易置雄霸州得

疾而還立第四子宗訓爲梁王魏仁浦同平章事  
范質王溥叅知樞密院事趙匡胤爲殿前都點檢  
周主殂年三十九謚睿武孝文皇帝廟號世宗葬  
慶陵梁王宗訓即位年七歲范質等受顧命  
唐太子弘冀卒以子從嘉爲吳王



人代紀畧卷之二十二終

人代紀要卷之二十三

明吳興顧應祥編集

大埔黃宸校刊 江陰湯明善校正

庠生倪佩 臧繼華同校

庚申宋太祖建隆元年

春正月兩日並出 點檢趙匡胤出師禦北漢次

陳橋將士擁立為帝入汴侍衛都指揮使韓通帥

師禦之為軍校王彥昇所殺匡胤代周命即皇帝

位是為宋太祖皇帝國號宋改元建隆廢周主宗

訃為鄭王以周故相范質王溥魏仁浦同平章事



周自郭威辛亥年篡漢位庚申年恭帝禪位于  
宋凡三主九年

王銍默記載宋祖自陳橋推戴入城周恭帝即  
衣白欄出居天清寺宋祖入六宮迎拜有二小  
兒卯角者亦拜詢之乃周世宗二子紀王熙謹  
勦王熙誨宋祖謂諸將曰此復何待左右提去  
潘美在後低頭不語宋祖曰汝以為不可耶以  
一子賜潘美收以為子後名惟正一子竟不知  
所終

始賜楊礪等十九人進士

周昭義節度使李筠結北漢起兵不克焚死  
以大梁為東京開封府洛陽為西京河南府  
以趙普為樞密使 竇儀為翰林學士

周太祖甥淮南節度使李重進舉兵反合族自焚  
立太廟追尊四代祖考

按宋立四世祖廟後以太祖受命立極當為始  
祖而僖祖初無功德親盡當祧朱子謂僖祖乃  
太祖之高祖考雖歷世久遠功德無傳然四世  
之後篤生神孫應天順人以寧兆庶其功德蓋  
不必親自為之然後為盛鄙見以為祖有功宗



有德當以創業之君為始祖方是

是年荆南高保融卒年四十一謚貞懿弟保勗嗣  
辛酉皇太后杜氏崩召趙普受遺命

杜太后監周世宗以幼兒主天下之失命傳位  
於弟史斷以為女后而知社稷之至計愚意不  
然有天下者使子不至於不肖傳之子亦所以  
止亂也

罷石守信等兵權 以弟光義為開封尹光美為  
興元尹 增飾先聖先師像自為孔顏贊命文臣  
分贊 占城女真入貢

制宦官給事毋過五十人

是年南唐徙都洪州唐主璟以憂卒年四十六第  
六子從嘉即位奉表乞加帝號許之謚璟為明道  
崇德文宣孝皇帝葬順陵廟號元宗從嘉更名煜  
是為後主

壬戌 命州縣長吏勸課農桑 視太學

定百官輪對制 命諸州不得專決死罪

禁火葬 以趙普為樞密使

遷周主宗訓于房州

占城遣使來朝 高麗入貢



是年荆南高保勗卒年三十九保融子繼冲立

癸亥乾德元年

初以文臣知州事 禁民鬪童男

置諸州通判

冬十一月合祭天地於南郊改元乾德

是年高繼冲以荆南降宋荆南平

荆南高季興自後梁開平元年鎮荆南據有其地統州十三傳從誨保融保勗繼冲凡五世五十七年而降於宋今荆州其故治

甲子

范質王溥魏仁浦罷趙普同平章事

初置叅知政事以薛居正呂餘慶爲之

以子德昭爲貴州防禦使 遣王全斌等伐蜀

南唐募民爲僧不親政事

乙丑

益蜀以孟昶爲秦國公尋卒

後蜀孟知祥於後唐同光三年據成都稱帝統四十六州傳子昶凡二世共四十年爲宋所滅王全斌等欲取雲南以圖進帝以斧畫大渡河曰此外非吾有也由是雲南遂不通中國

回鶻于闐入貢 置封椿庫

丙寅

鞞鞞入貢



求遺書 以孔宜爲曲阜主簿奉孔子祀  
策賢良方正于紫雲樓謂之制舉

罷羨餘賞格

戊辰 王后崩立宋氏爲后

大食國入貢

雷德驤論趙普責貶

冬十月改元開寶

北漢主劉鈞爲遼主譴責憂積成疾而卒年四十  
一謚孝和皇帝養子繼恩立其散指揮使侯霸榮  
弒之謀獻首于宋左僕射平章事郭無爲誅侯霸

榮立鈞養子繼元繼元妻段氏以小過爲養母郭  
氏所責既而以他疾卒繼元疑郭氏所殺遂縊弒  
郭氏

初劉崇有女嫁戍卒薛釗崇稱帝除其軍籍女  
常居中罕得見釗引佩刀刺女不死遂自裁生  
子繼恩女再適何氏生繼元何與女俱故二子  
幼孤崇以次子承鈞無嗣命育之

繼恩之弒五代史及通鑑續編俱曰侯霸榮弒  
之丘瓊臺世史正綱諸史會編通鑑纂要則直  
書郭無爲弒之及查宋史北漢世家明載繼恩



獨處一室供奉官侯霸榮謀持其首獻宋乘其  
無備白晝挺刃而入反扃其門以刃搯胷弑之  
年三十四立纔六十日無爲遣人登梯入殺霸  
榮立其弟繼元郭無爲小傳謂承鈞病與無爲  
論及後事謂其子繼恩不才無爲亦言其然繼  
恩既立知其事欲誅無爲畏懦不能決月餘霸  
榮弑繼恩無爲殺霸榮并人疑無爲授意霸榮  
殺之以滅口夫弑逆大罪豈可以疑似之言加  
之今止從宋史世家書之

遼景宗保寧元年

巳巳

春二月遼主田于懷州獲熊飲醉爲近侍庖丁所  
弑年三十九謚孝安敬正皇帝附葬懷陵世宗第  
二子賢小字明袞育于宮中至是即位改元保寧  
群臣上尊號爲天贊皇帝是爲景宗

是年宋始令民典賣田宅者輸錢印契

庚午

賜舉人屢試不第者出身 徵處士王昭素爲國  
子博士 省州縣官增其俸 遣潘美伐南漢

辛未

潘美克廣州劉鋹降封恩赦侯南漢亡

南漢劉隱自梁太祖開運三年據嶺南統四十  
七郡傳子玠爲弟晟所篡傳子鋹三世凡六十



三年為宋所滅今廣東廣州府是其所都

唐上表乞貶國號印文稱江南國王賜詔呼名

御史中丞劉溫叟卒

劉溫叟為中丞清介素聞開封尹光義遺錢五

百千不受一日過明德門宋祖方與中黃門數

人登樓溫叟知之命依常傳呼而過翊日請對

言人主非時登樓則下必希望恩賞臣所以呵

導而過欲示眾以陛下非時不登樓也帝善之

史稱溫叟重厚清介然亦明主能容之所謂邦

有道危言危行也

壬申

禁鑄錢為佛像 大雨河決出宮人

癸酉

禁玄象天文圖讖

始禁道士與僧不得畜妻孥

周主宗訓卒謚曰恭帝葬慶陵

初親試進士賜錢張宴 禁銅錢不得出化外

封丁璉為交趾郡王 封弟光義為晉王

趙普免 呂餘慶罷薛居正沈義倫同平章事

盧多遜叅知政事

高麗王昭卒子佃立

甲戌 三佛齊來貢



遣曹彬伐江南

乙亥 曹彬下江南李煜降南唐亡

南唐李昇晉天福二年禪吳位傳璟煜二世凡

歲三十九年而為宋所滅

丙子 春正月宋以李煜為違命侯

欲都長安晉王諫止

夏四月合祀天地於南郊

冬十月癸丑夕帝崩于萬歲殿壽五十謚英武聖

文神德皇帝廟號太祖弟光義即位改名炅是為

太宗皇帝

冬十二月改元太平興國 遷宋后西宮

以弟廷美為開封尹封齊王太祖子德昭為武功

郡王德芳興元尹 盧多遜同平章事楚昭輔為

樞密使

丁丑宋太宗太平興國二年

葬太祖永昌陵 賜進士呂蒙正等及第時張齊

賢亦在選一榜皆賜及第

戊寅 封孔子後孔宜為文宣公

定難節度使李克勳卒子繼筠代領其眾

隴西公李煜卒年四十二贈太師追封吳王



李煜七夕誕辰命妓作樂聲聞于外又傳其小詞有小樓昨夜又東風故國不堪回首夢魂中  
帝怒命秦王移具過飲既畢暴卒人謂以牽機藥發庭前反却數十回而死

吳越王錢俶以其地歸宋封俶為淮南國王  
吳越錢鏐於唐昭宗乾寧二年據兩浙傳元瓘元佐弘侖弘俶五主凡八十四年而納地于宋  
群臣上尊號應運統天聖神文武皇帝  
冬十一月合祀天地于園丘

巳卯

遼乾亨元年

帝自將伐北漢劉繼元降封彭城郡公

伐遼王師敗績 以楊業為代州刺史號楊無敵  
進封齊王廷美為秦王

皇子德昭自殺追封魏王謚曰懿

軍中嘗夜驚不知帝所在有謀立德昭者知帝處乃止帝不悅及還故不行太原之賞德昭以為言帝怒曰待汝自為之德昭退而自刎

定難留後李繼筠卒弟繼捧代

是年遼改元乾亨

北漢亡

北漢自後漢劉知遠弟劉崇於後周廣順元年



據太原稱帝統十二州傳子鈞養子繼恩繼元  
四世凡二十九年而為宋所滅今太原府是其  
故治

庚辰 衛公劉錕卒追封南越王

夏李繼筠卒弟繼捧立

是歲始混一中國

辛巳 太祖次子興元尹德芳卒贈中書令岐王謚康惠

薛居正卒 楚昭輔罷

女真遣使來貢

以趙普為司徒兼侍中封梁國公復掌樞軸

壬午

秦王廷美為柴禹錫告變罷為西京留守尋貶涪

陵縣公房州安置 盧多遜流崖州

以柴禹錫為樞密副使

夏李繼捧入朝獻夏銀綬宥四州其從弟李繼遷

叛走地斤澤以李繼捧為彰德節度使

遼主賢獵于祥古山卒于行在年三十五謚孝成

皇帝廟號景宗後加謚孝成康靖皇帝子隆緒即

位年一十二母睿聖皇后蕭氏聽政是為聖宗文

武大孝宣皇帝改元統和復國號曰契丹群臣上

尊號曰昭聖皇帝



高麗王佃卒弟治立

癸未

契丹聖宗統和元年

宴進士於瓊林苑進士分三甲始此 趙普罷

宋琪李昉同平章事李穆呂蒙正李至參政

甲申雍熙元年十一月改元

涪陵郡公廷美以憂卒于房州

召華山隱士陳搏入朝放還尋卒

乙酉

宴群臣後苑賞花 宴進士瓊林苑及第第一人

授節度使推官賜詩 楚王元佐有罪廢為庶人

丙戌

曹彬等伐契丹 楊業戰死契丹復陷雲朔等城

張齊賢敗契丹于代州

李繼遷降契丹妻以義成公主封夏國王復姓李

丁亥

改封錢俶為許王 以李繼捧為崇信軍節度使

戊子端拱元年春正月改

李昉罷 以趙普為太保兼侍中

呂蒙正同平章事 賜李繼捧姓名趙保忠遣歸

為定難節度使李繼遷為銀州刺史

錢俶改封鄧王尋卒追封秦國王謚忠懿七子皆

貴顯 置祕閣

是年契丹初置貢舉



巳丑 尹繼倫大敗契丹于徐河稱黑面大王

作開寶寺塔高三百六十尺田錫諫

庚寅淳化元年正月改

趙普致仕 貸江州義門陳競粟

詔致仕官給半俸

契丹封李繼遷為夏王

辛卯 劉繼元卒追封彭城郡王 以張齊賢陳恕參知

政事張遜溫仲舒寇準為樞密副使 王沔陳恕

呂蒙正罷以李昉張齊賢平章事賈黃中李沆參

政 王顯免張遜知樞密院事溫仲舒寇準同知

樞密院事 李繼遷降以為銀州觀察使賜名趙

保吉 趙保忠降契丹封西平王復名李繼捧

壬辰 召終南隱士种放不至 趙普卒年七十一

詔舉人糊名考校

癸巳 分天下為河南河東關西劔南淮南江南東江南

西浙東浙西廣南共十道京東為左計京西為右

計 以錢若水為翰林學士

張齊賢引咎免以呂端參知政事 張遜寇準不

協俱免以柴禹錫知樞密院事劉昌言同知院事

李昉賈黃中俱以久雨罷復以呂蒙正同平章事



陳恕爲三司總計使封黎桓爲交趾郡王

蜀中困於徵求青神民王小波作亂敗死其妻弟

李順繼起

甲午 李順據成都僭號大蜀遣宦官王繼恩平之以繼

恩爲宣政使 張詠知益州 寇準參知政事

李繼隆執趙保忠至賜爵宥罪侯

以襄王元侃爲開封尹封壽王

是年契丹行大明歷舉明經茂才異等之士

乙未至道元年 春正月改元

觀燈于乾元殿 劉昌言免錢若水同知樞密院

事 呂蒙正柴禹錫蘇易簡罷呂端同平章事張

洎參政趙鎔知樞密事 開寶皇后宋氏崩不成

服貶翰林學士王禹偁 以李繼遷爲鄜州節度

使不奉詔 立元侃爲太子更名恒

封牂柯蠻酋龍漢瑋爲歸化王

丙申 以太祖孫德昭長子惟吉爲閬州觀察使

寇準免 以李昌齡參知政事

丁酉 張洎罷溫仲舒王化基參知政事李惟清同知樞

密院事 分天下爲京東京西河北河東陝西江

東江西浙東浙西淮南荆湖福建劔南東劔南西



廣南凡十五路各置轉運使

春三月帝崩年五十九謚神功聖德文武皇帝廟號太宗葬永熙陵太子恒即位年三十是爲真宗皇帝以生日爲承天節李至李沆參知政事

李昌齡有罪貶 追復涪王廷美爲秦王復封兄元佐爲楚王 錢若水請罷 趙鎔李惟清罷以曹彬爲樞密使向敏中夏侯嶠爲副使

以孔世延襲封文宣公

李繼遷降以爲定難節度使復姓名趙保吉

進封交趾王爲南平王 高麗王洽卒姪誦立

戊戌宋真宗咸平元年 春正月改元

呂端李至溫仲舒夏侯嶠罷 張齊賢李沆同平

章事 向敏中參知政事 楊礪宋湜爲樞密副

使 西天僧來朝云七年始到

己亥 詔群臣迎養父母 給外任官職田

曹彬卒贈中書令封濟陽王謚武惠 以王顯爲

樞密使 楊礪卒帝冒雨臨喪步入吊之

以呂文仲爲翰林侍讀學士邢昺爲侍講學士置

講讀學士始此 群臣上尊號崇文廣武聖明仁

孝皇帝



庚子 益州王均作亂僭號大蜀改元化順招安使雷有終平之 宴群臣後苑賞花釣魚遂爲永制

呂端卒張齊賢免

辛丑 呂蒙正向敏中同平章事 王旦王欽若參知政事 馮拯陳堯叟同知樞密 汰冗吏十九萬五千八百人 趙保吉復叛

壬寅 召种放爲左司諫直昭文館賜第隆重後置田爭訟時議薄之爲王嗣宗所論極其醜詆

向敏中免

癸卯 張詠復知益州 呂蒙正罷

趙保吉爲西京首領潘羅支擊敗走死子德明嗣契丹封爲西平王

甲辰景德元年 春正月改元

以畢士安寇準同平章事

冬十二月契丹大舉入寇用寇準計親征幸澶淵與契丹盟議每歲輸銀十萬兩絹二十萬匹

寇準勸帝親征以安社稷固見其功然從此而納歲幣于夷狄亦未見其善也是雖不出準之初心然準當以爲愧而退焉自處可也顧乃矜功自伐此其所以來王欽若之譖歟



乙巳 以契丹和大赦 置國信司 始歸幣契丹

遣太子中允孫僅使契丹稱南北朝

馮拯叅知政事楊億翰林學士 增置舉六科

畢士安卒賻白金五千兩 詔致仕官給半俸

丙午 以宋州爲應天府 王欽若譖寇準罷知陝州

王旦同平章事趙安仁叅政王欽若陳堯叟知樞

密院事 以趙德明爲定難節度使

南平王黎桓死其子龍廷殺兄龍越自立

契丹上主尊號至德廣孝昭聖天輔皇帝大赦放

進士楊佖等二十三人及第

丁未 汀州黥卒王捷詭言司命真君趙氏五月十三日

降于其家是爲聖祖宦者劉承珪以聞賜捷名中

正祥瑞事起

是年交州入貢封黎龍廷爲交趾郡王賜名至忠

戊申大中祥符元年

春正月王欽若謀作天書改元 賜王旦珠議封

禪 五月醴泉出六月受泰山天書群臣上尊號

崇文廣武儀天尊道寶應章感聖明仁孝皇帝

冬十一月過曲阜謁孔子廟加謚玄聖文宣王

太公爲昭烈武成王 周公文憲王



是年作玉清昭應宮貯天書

趙德明追尊李繼遷為應運法天神智仁聖至道

廣德光孝皇帝廟號武宗

巳酉 加聖祖司命天尊以方士王中正為左武衛將軍

三司使丁謂上封禪祥瑞圖

是年始封孔子廟從祀公侯伯 罷置科舉

契丹主母蕭氏卒

庚戌 交州將李公蘊殺其主黎至忠以公蘊為交趾郡

王

高麗康肇弒其主誦立誦弟詢契丹攻殺康肇詢

奔平州 頒釋奠先聖儀并祭器圖於天下

辛亥 祭后土于汾陰 召陝州隱士魏野不至畫其所

居圖 加五嶽神以帝號

壬子 向敏中復相 契丹開泰元年

王欽若陳堯叟為樞密使丁謂叅政

冬十月帝自言聖祖降于延恩殿王旦等稱賀詔

天下加聖祖尊號祖聖上靈高道九天司命保生

天尊大帝群臣上帝尊號崇文廣武感天尊道應

真祐德上聖欽明仁孝皇帝

以孔子謚玄字犯聖祖趙元朗諱改為至聖文宣



王 給占城稻種子民

是年宋賜杭州隱士林逋粟帛

是年冬十月契丹上其主尊號弘文宣武尊道至

德崇仁廣孝聰睿昭聖神贊天輔皇帝大赦改元

開泰

癸丑 禁內臣出使干預公事

甲寅 帝如亳州謁老子于太清宮加號太上老君混元

上德皇帝 王欽若馬知節以奏事相爭與陳堯

叟俱罷 寇準為樞密使王旦薦之也

契丹伐高麗大敗而還

張齊賢卒

乙卯

春正月上玉皇尊號曰太上開天執符御曆含真

體道玉皇大帝 加楚王元佐天策上將軍興

州牧劔履上殿不名 夏四月寇準免以王欽若

陳堯叟為樞密使 張詠卒 賜信州道士張正

隨真靜先生王欽若奏立授籙院及上清觀張道

丙辰

陵後賜號始此 丁謂陳堯叟免陳彭年王魯張知白叅政

丁巳

天禧元年 春正月改元

封李公蘊為南平郡王 王魯不受會靈觀使尋

罷 王旦罷尋卒 王欽若同平章事李迪叅政



馬知節為樞密使

戊午 立子受益為皇太子更名禎 馬知節罷

曹利用為樞密使

己未 春三月巡檢朱能作為天書置乾佑山寇準知永

興軍奏聞迎入禁中 王欽若有罪免以寇準同

平章事丁謂參知政事 馬知節罷尋與曹利用

為樞密使

以天書再見會道釋於天安殿凡一萬三千八十

六人

庚申 向敏中卒 楊億復為翰林學士卒

夏六月帝有疾寇準欲請太子監國事泄罷為太

子太傅封萊國公 李廸丁謂平章事

馮拯樞密使 內侍周懷政謀傳位太子殺丁謂

復相寇準謂以聞誅懷政貶準知相州復貶道州

司馬以任中正王曾參政錢惟演樞密副使

冬十一月李廸丁謂罷丁謂復留翰林學士劉筠

不肯改制晏殊草之筠請外遂出知廬州

馮拯平章事

是年夏四月兩月並見于西南

辛酉

契丹太平元年



以孔聖佑襲封文宣公

冬十一月契丹上其主尊號睿文英武遵道至德  
崇仁廣孝功成治定昭聖神贊天輔皇帝大赦改  
元太平

是年契丹生女真部烏古廼始生是為金景祖自  
始祖函普始居完顏部至此六世矣為生女真部  
節度使俗呼為太師

壬戌乾興元年春正月改元

二月群臣上尊號曰應天尊道欽明仁孝皇帝  
是月帝崩年五十五在位二十六年謚文明武定

章聖元孝皇帝廟號真宗慶曆七年加謚膺符稽  
古神功讓德文明武定章聖元孝皇帝第六子太  
子禎即位年十三是為仁宗皇帝劉太后臨朝

夏四月丁謂與太后誣以朋黨貶寇準雷州司戶  
李迪衡州團練副使王曾平章事呂夷簡魯宗  
道叅政秋七月丁謂以女道士劉德妙妖誣事  
貶崖州司戶冬十月葬真宗未定陵以天書為  
殉

癸亥宋仁宗天聖元年

馮拯罷王欽若平章事寇準卒于雷州贈中書



令復萊國公諡忠愍

甲子 視國子監 立郭氏為皇后

契丹改鴨子河為混同江

乙丑 王欽若卒張知白平章事張耆為樞密使

丙寅

丁卯 龍圖閣待制孔道輔使契丹

戊辰 張知白卒張士遜平章事 趙德明以元昊為太

子

魯宗道卒張士遜罷呂夷簡平章事夏竦薛奎叅

政陳堯佐樞密副使 罷曹利用為衛將軍尋安

置房州行至襄陽自殺 復制舉諸科

王清昭應宮災王曾以首相罷 帝率百官朝太

后于會寧殿祕閣校理范仲淹諫不納又請太后

還政仲淹乞外出判河中

是年南平王李公蘊卒以其子德政為交趾郡王

契丹東京舍利軍詳穩大延琳作亂囚留守附馬

蕭孝先及南陽公主殺戶部使韓紹勳副使王嘉

四捷軍都指揮使蕭頗得僭稱興遼改元天慶

庚午 賜信州道士張乾曜澄素先生 初制武舉

契丹燕王蕭孝穆國舅詳穩蕭匹敵平大延琳



辛未

契丹景福元年

夏六月契丹主隆緒卒于大福河北行宮年六十一在位四十九年太子宗真立宗真字夷不謹小字只骨聖宗妃蕭氏耨斤所生齊天后蕭氏取養之太平元年立爲太子至是即位立其所生母爲太后治國事改元景福太后蕭耨斤遷齊天后於臨潢有司請以生辰爲求壽節太后生辰爲慶聖節冬十一月葬聖宗慶陵名其山慶雲殿曰望仙是年契丹以興平公主嫁夏李德昭子元昊封夏國公附馬都尉

壬申明道元年

契丹興宗重熙元年

夏西平王顯道元年

以張士遜平章事 李宸妃卒呂夷簡論葬禮

契丹太后蕭耨斤毒弑齊天后于臨潢

群臣上契丹主尊號文武神聖昭孝皇帝冬十一

月大赦改元重熙

冬十月夏趙德明卒年五十一謚光聖皇帝廟號

太宗追尊李繼遷爲太祖子元昊繼宋以爲定難

節度使西平王契丹冊爲夏國王元昊避父諱國

中稱顯道元年



是年契丹生女真部避興宗諱改號女直

癸酉

夏開運元年

劉太后崩帝始親政 呂夷簡張耆夏竦俱罷李

迪平章事 廢皇后郭氏貶御史中丞孔道輔司

諫范仲淹 冬十月呂夷簡復相張士遜免

夏改元開運

甲戌景祐元年

夏廣民元年

王曙卒以王魯為樞密使 九月立曹彬孫女曹

氏為后

契丹太后蕭耨斤欲立少子重元重元告契丹主

收太后符璽遷於慶州始親決政事仍以重元為

皇太弟

是年趙元昊反以開運同後梁年號改號廣民元

昊母衛慕氏族謀殺元昊事覺醜弑其母告哀于

宋契丹

乙亥

春二月育宗室允讓子宗實于宮中 李迪罷王

魯平章事蔡齊盛度叅政 故郭后暴崩追復后

號不附廟 群臣上尊號景祐體天法道欽文聰

武聖神孝德皇帝

丙子

夏大慶元年



優給致仕官俸 知開封府范仲淹以言事出知  
饒州集賢校理余靖館閣校勘尹洙上書救之歐  
陽修以書責司諫高若訥若訥上其書修貶夷陵  
令館閣蔡襄作四賢一不肖詩 初置太宗正司  
以王德用知樞密院章得象同知院事  
是年契丹初試進士以日射三十六熊為賦

夏元昊改元大慶

丁丑 呂夷簡王曾宋綬蔡齊罷 王隨陳堯佐平章事

韓億程琳石中立叅政盛度知樞密王醜同知

丁謂死

戊寅寶元元年 十一月改 夏景宗天授禮法延祚元年

王隨陳堯佐韓億石中立免 張士遜致仕章得

象平章事王醜李若谷叅政陳執中同知樞密

冬十一月祀天地于圜丘大赦改元群臣上尊號

曰寶元體天法道欽文聰武神聖孝德皇帝

王曾卒

是年西夏元昊更名曩霄稱皇帝國號大夏改元

天授禮法延祚

巳卯 盛度程琳免貶孔道輔知鄆州發憤卒

王醜知樞密宋庠叅政



契丹主迎其母還

庚辰康定元年 二月改

夏元昊入寇范雍失律貶安州 以夏竦為陝西

招討韓琦范仲淹副使 二月改元康定去尊號

寶元二字 張士遜致仕呂夷簡平章事王黼陳

執中張觀免晏殊宋綬知樞密王貽永杜衍同知

樞密

辛巳慶曆元年

任福敗死韓琦貶秦州 范仲淹坐元昊通書貶

耀州 宋庠鄭戩罷王舉正參政任中師樞密任

布樞副

冬十一月郊祀大赦改元

壬午 富弼使契丹 徵處士孫復為國子監直講

癸未 晏殊平章事賈昌朝參政蔡襄歐陽脩王素知諫

院余靖右正言杜衍樞密韓琦范仲淹樞副

夏竦罷 石介作慶曆聖德詩尋以范仲淹參政

富弼樞副韓琦宣撫陝西

甲申 詔天下州縣立學更定科舉法 晏殊罷杜衍平

章事 賈昌朝樞密使 范仲淹宣撫陝西河東

富弼宣撫河北 呂夷簡卒 夏竦傾富弼



是年與夏和冊曩霄爲夏國王

乙酉 范仲淹富弼杜衍俱罷 賈昌朝平章事兼樞密

王貽永樞密宋庠參政 韓琦罷章得象免陳執

中平章事吳育參政丁度樞副

丙戌 吳育樞副丁度參政

是年高麗王欽卒子徽嗣

丁亥 賈昌朝吳育免夏竦平章事改樞密使 文彥博

參政高若訥樞副 貝州宣毅卒王則以妖幻習

五龍滴等經及圖讖書稱彌勒佛持世作亂國號

安陽改元德勝旗幟皆以佛爲號

戊子 文彥博擒王則入爲平章事薦明鎬參政鎬尋卒

宋庠樞密使龐籍參政 五月無雲而震

夏竦免竦怨石介譏已欲報之而介已卒會孔直

溫反搜其家得介書竦因言介詐死走契丹請發

其棺杜衍知兗州保免

夏竦初則使女奴習石介字偽作廢立詔以傾

富弼今又誣介北走契丹欲發其棺立心若此

何以爲宰相乎

以霖雨爲災頒德音改明年爲皇祐元年

是年二月夏曩霄卒年四十六謚武烈皇帝廟號



景宗子諒祚立生甫十月養于國舅訛龐與二三  
大將分治國事宋冊諒祚為夏國王

己丑皇祐元年

夏毅宗延嗣寧國元年

陳執中罷 宋庠平章事高若訥參政龐籍樞密

使梁適樞副

儂智高據廣源作亂

庚寅

夏天祐垂聖元年

始親享天地於明堂

是年夏改元天祐垂聖

辛卯

宋庠免 殿中侍御史裏行唐介論宣徽使張堯

佐遂劾文彥博貶英州別駕彥博罷知許州

按唐介劾文彥博織燈籠錦以獻貴妃借使有

之亦君子而未仁者李師中作詩送介槩以姦

諛目之不亦過乎

龐籍平章事高若訥樞密梁適參政王堯臣樞副

壬辰

儂智高僭號大南國稱仁惠皇帝改元啓曆以狄

青為宣撫使擊之

是年范仲淹卒

癸巳

夏福聖承道元年

狄青夜度崑崙關大破儂智高廣南平智高走大



理以狄青爲樞密使孫沔爲副使

龐籍罷陳執中梁適平章事

夏改元福聖承道

甲午至和元年

貴妃張氏卒謚温成皇后孫沔罷田况樞副王

德用樞密使四月下德音改元

梁適免劉沆平章事程戡參政

乙未

遼道宗清寧元年

改封孔子後世愿爲衍聖公

陳執中免文彦博富弼平章事

秋八月契丹主如長春河卒于行宮年四十謚神聖孝章皇帝廟號興宗子洪基立以重元爲皇太叔

是年南平王李德政卒子日尊嗣

丙申嘉祐元年

王堯臣參政程戡樞副

文彦博薦唐介復知諫院

御史吳中請還唐介文彦博言于帝曰介頃言

多中臣病雖有風聞之誤然責之太重介乃得

召還彦博可謂得大臣之體矣



狄青以人言出判陳州 韓琦為樞密使

王德用罷賈昌朝樞密使 劉沆免曾公亮叅政

包拯知開封府 九月恭謝天地改元嘉祐

丁酉 夏禪都元年

狄青卒 歐陽脩知貢舉變文體 始詔進士殿

試不黜落 制明經科

夏改元禪都

戊戌 文彥博以老求去以使相判河南封潞國公賈昌

朝罷韓琦平章事 宋庠田况樞密使

張昇樞副

己亥 汝南王允讓卒追封濮王

召河南處士邵雍不至

庚子 呂誨劾程戡免孫沭樞副又劾宋庠免曾公亮樞

密使張昇孫抃參政歐陽脩陳旭趙槩樞副

王安石為三司度支判官上萬言書

辛丑 陳旭罷包拯樞副唐介以劾旭復外補司馬光

知諫院 王安石知制誥以母喪去 曾公亮平

章事張昇樞密胡宿樞副歐陽脩叅政

壬寅 立濮安懿王子宗實為皇太子賜名曙封鉅鹿郡

公 孫抃罷趙槩叅政吳奎樞副 包拯卒



召福州處士陳烈為國子直講不至

癸卯

夏拱化元年

春三月帝崩于福寧殿 壽五十四在位四十二

年謚神文聖武明孝皇帝廟號仁宗葬永昭陵

四月皇太子曙即位濮安懿王允讓第十二子仁

宗育於宮中是為英宗皇帝曹太后權同聽政

富弼為樞密使 立皇后高氏

夏主改元拱化

契丹皇太叔重元反耶律仁先敗之重元自殺

人代紀要卷之二十三



